

ՔՐԴԵՐԻ ԵՎ ՔՐԴՍԱՆԻ ՄԻՋՆԱԴԱՐՅԱՆ ՇՐՋԱՆԻ
ՊԱՏՄՈՒԹՅԱՆ ՄԻ ՇԱՐՔ ՀԱՐՑԵՐ ՔՆՆԱԿԱՆ ԼՈՒՅՍԻ ՆԵՐՔՈՒ*

ՎԱՀԱՆ ԲԱՅԲՈՒՐԴՅԱՆ

Բանալի բառեր՝ քրդեր, խալիֆայություն, արևելագետ, Ուուհայեցի, Տիգրիս, Հայաստան:

Նախաբան

Քուրդ ժողովրդի միջնադարյան շրջանի պատմությունը հափազանց վատ է ուսումնասիրված և, ըստ էության, քրդագիտության բաց էջերից մեկն է: Արևելագետ Վլադիմիր Մինորսկու կարծիքով մինչև IX դարը քրդերի պատմությունը պարունակում է անորոշության մշուշով: Դրա հիմնական պատճառն աղբյուրների սղությունն է կամ գրեթե բացակայությունը: Արաբական աղբյուրներն անդրադառնում են քրդերի պատմությանը՝ սկսած Օմայան խալիֆայության շրջանից (661–750 թթ.): Ավելի վաղ հիշատակումներ մեզ հեն հասել, հավանաբար, դրանց բացակայության պատճառով: Ուշագրավ է նշել, որ Օմայան և նրան հաջորդած Աբբասյան խալիֆայության (750–1258 թթ.) ժամանակաշրջանի արաբ բոլոր պատմիչների, տարեգիրների, աշխարհագրագետների, ճանապարհորդների և այլ երկերում առհասարակ բացակայում է «Քրդաստան» անվանումը:

Միջնադարյան արաբական աղբյուրներում առկա են քրդերի վերաբերյալ միայն որոշ հիշատակումներ²: Հանդիպում է, օրինակ, «ալ-Ջիբալ ալ-աքրադ» բառակապակցությունը, որը բառացիորեն նշանակում է «քրդական լեռներ», երբեմն՝ նաև «ալ-աքրադ» («քուրդ», «քրդական») ձևերը³: Արաբ աշխարհագրագետ Իբն-Հաֆքալը (վախճանվել է 988 թ.), իր «Քիթաբ սուրաթ ալ-արդ» երկում խոսելով «ալ-Ջիբալ» տեղանքի մասին, այն անվանում է «քրդերի ամառային և ձմեռային արոտավայրեր»⁴: Ի դեպ, «արդ ալ աքրադ» («քրդերի հողեր», «քրդական երկրամաս») արտահայտությունը գործածվել է նաև Կենտրոնական Ասիայի թյուրք աշխարհագրագետ, լեզվագետ ու ճանապարհորդ Մոհամմադ Կաշգարիի 1057 թ. կազմած քարտեզում⁵:

* Ներկայացվել է 03. IV. 2023 թ., գրախոսվել է 18. IV. 2023 թ., ընդունվել է տպագրության 19. VI. 2023 թ.:

¹ Minorsky. 1954, 1134–1135.

² James. 2006.

³ Поладян. 1987, 10.

⁴ Ibn-Hawqal, Abi Al-Qasim al-Nusuibi, Kitab Surat al ard. 1979, 239–241.

⁵ Eppel. 2016, 10.

Միջնադարյան աղբյուրների հիշատակումները քրդերի մասին

Այսպիսով, արաբական մատենագրության մեջ քրդերի մասին առաջին հիշատակումները հանդես են գալիս սկսած VII–VIII դարերից, ընդ որում, միշտ էլ, որ «քուրդ» բառը էթնիկական իմաստ էր կրում: XIX դարի վերջերից եվրոպական արևելագիտական գրականության մեջ շրջանառվում էր տեսակետ այն մասին, որ արաբալեզու աղբյուրներում «քուրդ» (հոգնակին՝ «աքրադ») տերմինի տակ նկատի է առնվել նաև ընդարձակ խալիֆայության տարբեր մասերում ապրող իրանալեզու լեռնային վաչկատուն ցեղերին⁶ կամ, ընդհանրապես, այն ընկալվել է «քոչվոր», «վաչկատուն», «անասնապահ», «հովիվ», «թափառակենցաղ խաշնարած» իմաստով⁷: Այդ տեսակետը հաստատվում է նաև պարսիկ միջնադարյան հեղինակների բերած վկայություններից: Այսպես, Համզա ալ-Իսֆահանին (X դար) գրում է, որ պարսիկները դեյլեմցիներին⁸ անվանում էին «Թաբարիսթանի քրդեր», իսկ արաբներին՝ «Սուրիստանի քրդեր»⁹: Հավանաբար, դրա պատճառն այն է՝ «քուրդ» («քորդ») բառը, որպես «քոչվոր», «անասնապահ» հասկացության հոմանիշ, օգտագործվել է այն ցեղերի վերաբերյալ, որոնք իրենց կենցաղով, վարվելակերպով, զբաղմունքներով ու այլ հատկանիշներով հար և նման էին քրդերին:

Վերոհիշյալ հանգամանքն ուսումնասիրողների առջև դնում է լրացուցիչ դժվարություններ այն առումով, որ համարյա անհնարին է պարզել՝ արաբալեզու աղբյուրներում հանդիպող «քուրդ» տերմինի տակ ո՞ւմ է նկատի առնվել իրական քրդերին, թե՞ վաչկատուն անասնապահ մեկ այլ ժողովուրդ:

Հարկ է նշել, որ «քուրդ» էթնիկական անվանումն անձանոթ է վաղ միջնադարյան հայ պատմիչներին (V դար), ինչպես նաև VII–VIII դդ. հեղինակներ Սեբեոսին և Ղևոնդին: Նույնիսկ X–XI դդ. պատմիչներ Հովհաննես Դրասխանակերտցին, Ստեփանոս Տարոնեցի Ասողիկը, Թովմա Արծրունին և Արիստակես Լաստիվերտցին չեն հիշատակում «քուրդ» էթնոնիմը: Միայն XII–XIII դարերում այն սկսել է հանդիպել ինչպես հայ պատմագրության մեջ, այնպես էլ՝ ձեռագրերի հիշատակարաններում:

Այդ հեղինակներից Մատթեոս Ուռհայեցին առաջինն է, ով իր «Ժամանակագրությունում» 1041–1042 թթ. անցուղարձերի կապակցությամբ հիշատակում է «քուրդ» էթնիկական անվանումը: Իսկ XII դարում «քուրդ» էթնոնիմն արդեն կանոնավոր ավանդվում է հայկական սկզբնաղբյուրներում¹⁰: Օրինակ՝ XIII դ. հեղինակներ Կիրակոս Գանձակեցին և Վարդան Արևելցին մինչև XII դ. դեպքերին անդրադառնալիս օգտագործել են «մար», այնուհետև՝ XII դարից սկսած՝ «քուրդ» էթնոնիմները¹¹: Իսկ ուշ միջնադարի պատմիչներ Առաքել

⁶ Nöldeke. 1898, 78–79; Limbert. 1968, 48; Anthony. 1991; Asatrian 2003, 1–58.

⁷ Ozoglu. 2007.

⁸ Դեյլեմցիները Կասպից ծովի հարավային լեռնային շրջաններում բնակվող, իրականական ծագում ունեցող հին ժողովուրդ էր:

⁹ Minorsky. 1940, 144–145.

¹⁰ Մ ա Ր Գ ա Ր Յ ա ն. 2019, 244–245:

¹¹ Մ ա Ր Գ ա Ր Յ ա ն. 1992, 146–149:

Դավրիժեցին¹² ու Զաքարիա Սարկավազն¹³ արդեն զանգվածաբար գործածում են «մար» և «քուրդ» էթնոնիմները՝ որպես հոմանիշներ:

Նորագույն ուսումնասիրողներից Վլադիմիր Իվանովը համոզիչ ցույց է տալիս, որ «քուրդ» անվանումով միջնադարում բնորոշվում էին իրանալեզու բոլոր քոչվորները, ուստի և այն նույնական չէ ժամանակակից էթնոնիմին¹⁴:

Արաբական խալիֆայության ողջ շրջանում Քրդստանը երբեք գոյություն չի ունեցել որպես քաղաքական և վարչատարածքային մի ամբողջություն, իսկ քուրդ բնակչությունը ցրված է եղել Առաջավոր Ասիայի տարբեր մասերում՝ անշուշտ, առաձին՝ վայրերում կազմելով հոծ զանգվածներ: Զափազանց բարդ խնդիր է միջնադարում քրդերի բնակության ստույգ արեալի և աշխարհագրական սահմանների որոշումը: Որտե՞ղ է գտնվել Քրդստանը, որտե՞ք են նրա սահմանները, ո՞ր տարածքներում են քրդերը բնիկ, որտեղի՞ց են գաղթել և տվյալ վայրում ե՞րբ են հաստատվել: Այս հարցերին պատասխանելը չափազանց դժվար է, քանի որ Քրդստանը չի եղել որոշակի սահմաններ ունեցող երկիր, առավել ևս, որ քրդերը պետականություն չեն ունեցել, որպեսզի հստակորեն ճշտորոշվեին նրա աշխարհագրական սահմանները: Բացի այդ, Քրդստանի աշխարհագրական, լեզվական, պատմական սահմանները քուրդ ժողովրդի գոյության ողջ ընթացքում ներդաշնակ միություններ չեն համապատասխանել միմյանց, քանի որ դրանք եղել են հարափոփոխ և երբեք հաստատուն վիճակ չեն ունեցել:

Միջնադարյան, մասնավորապես՝ արաբական, սկզբնաղբյուրների հաղորդած չափազանց աղքատիկ տեղեկությունների համաձայն՝ արաբական նվաճումներին նախորդող ժամանակաշրջանում քրդերը բնակվում էին մի տարածքում, որը մոտավորապես համապատասխանում է ժամանակակից Իրաքյան և Իրանական Քրդստանին:

Օմայյան խալիֆայության շրջանի պատմաաշխարհագրական գրականության մեջ հանդիպում է «ազ-Ջավզան» տերմինը, որը ստուգաբանվում է քրդերեն «գոզանից» և նշանակում է «ամառային արոտավայր»: Այդ անվանումը վկայում է այն մասին, որ խոսքը վերաբերում է վաչկատուն քոչվորական կյանք վարող ժողովրդի մասին: Այստեղից ենթադրվում է, որ աղբյուրներում հիշատակված այդ «գոզանները» հենց քրդերն են: Ընդ որում, արաբական խալիֆայությունում քրդերի բնակության վայրերի մասին խոսելիս արաբ պատմիչների օգտագործած «ազ-Ջավզան» և «ալ-Ջիբալ ալ-Աքրադ» անվանումների տակ տարբեր հեղինակներ ընկալել են տարբեր իմաստներ: Մուղադ-դասին, օրինակ, Ջավզանը համարել է Ջազիրե իբն-Օմարի շրջանը: Իբն ալ-Ասիրը Ջավզան է համարում այն տարածքը, որը տարածվում էր Մոսուլից երկու օրվա ճանապարհով մինչև Խիլաթի (Ախլաթի) սահմանները և ձգվում էր մինչև Ատրպատական՝ Սալմաստի մոտակայքը: Իսկ Յաղուբի համար Ջավզանն այն ընդարձակ նահանգն է, որը գտնվում էր Հայաստանի լեռների,

¹² Դավրիժեցի. 1990, 63, 487:

¹³ Զաքարիայ Սարկավազի Պատմագրություն. 1870, 60–61:

¹⁴ Ivanov. 1940, 42.

խիլաթի, Ատրպատականի, Դիյար Բաքրի և Մոսուլի միջև ընկած չրջաններում¹⁵:

Քուրդ պատմիչ Շարաֆ ալ-Դին Բիթլիսին իր «Շարաֆնամե»-ում Քրդատանի սահմանների մասին խոսելիս, հավանաբար, նկատի ունենալով քրդերի բնակության և քրդական առանձին խմբերի և հավաքականությունների ներկայության աշխարհագրական արեալը՝ ներկայացնում է հետևյալ պատկերը. Հնդկական օվկիանոսի ափերից և Պարսից ծոցի Հորմուզի նեղուցից մինչև Փոքր Ասիայի Մալաթիա և Մարաշ քաղաքները: Նա Քրդատանի կազմի մեջ է ներառում նաև Իրանի հարավում գտնվող Ֆարս նահանգը, Պարսկական Իրաքը, Ատրպատականը, Մեծ Հայքն ու Փոքր Հայքը, Արաբական Իրաքը, Մոսուլը և Դիարբեքիրը¹⁶:

Արաբական տիրապետության ժամանակաշրջանում՝ սկսած XIII դարի 30–40-ական թվականներից, արաբալեզու աղբյուրները որպես քրդական ցեղերի բնակության վայրեր հիշատակում են Իրանական և Իրաքյան Քրդատանի հետևյալ վայրերը. Հուլվան, Քերմանշահ, Շահբեզուր, Մոսուլ, Ատրպատական, Ֆարս, Խուզեսթան, Ջազիրա, Ջիրբալ¹⁷:

Քրդական ցեղերի տարածման աշխարհագրական սահմաններին անդրադարձել է նաև Մատթեոս Ուռհայեցին: Նա Քրդատան է համարում միայն Ամիդի և Մայաֆարեքինի (Նիքիեթո, ներկայումս՝ Սիլվան) չրջանների միջև ընկած վայրերը, որոնք տեղական ժամանակ մտնում էին Մարվանյանների ամիրայության տիրույթների մեջ¹⁸: Ուռհայեցին հաղորդում է, որ քրդերը դեռևս բնակության կայուն չրջան ունեցող էթնոս չեն հանդիսանում, սակայն նրանց բնակության չրջաններն ընդարձակ են:

Նիկողայոս Ադոնցը պատմական Քրդատանի տարածքի մասին

Ըստ անվանի պատմաբան Նիկողայոս Ադոնցի, պատմական Քրդատանի տարածքն ընդգրկում է հետևյալ երկրամասերը. «... Զագրոսի լեռնաշղթայի լայնածավալ բարձրավանդակը Ուրմիա լճից և Բոհթան գետից համարյա մինչև Լուրիսթանի տափարակները և երկու կողմից նրան հարող արևմուտքից Տիգրիսի և արևելքից Դիգֆալի գետահովիտները: Այս տարածքի մեջ են մտնում Սուլթուկադի մարզը, Արդեշանը և Դիգֆալ գետի ավազանը մինչև Պարսկական Արաբստան, ինչպես նաև Հյուսիսային Միջագետքը կամ Մոսուլի վիլայեթը»¹⁹: «Նշված սահմաններում են պարփակված, – շարունակում է նա, – քրդերով, նրանց ազգակից լեռնական ցեղերով, որոնք գերազանցապես իրանական ծագում ունեն, բնակեցված հողերը: Աշխարհագրական առումով ամբողջական այդ տարածքը լիովին համապատասխանում է նրա բնակիչների հովվական-քոչվորական կենսաձևին: Զագրոսի ալպերն իրենց գեղատեսիլ գահավանդակներով, որոնք ցածրանում են դեպի հիշյալ գետերի հովիտները, հնագույն ժամանակներից հովվական ցեղերի բնակավայր էին»²⁰:

¹⁵ Лазарев, Мгои, Васильева, Гасратян, Жигалина. 1999.

¹⁶ Sharafal-Din Bitlisi. 2005, 59.

¹⁷ Փ ո լ ա դ յ ա ն. 1999, 44–45:

¹⁸ Մ ա տ թ ե ո ս Ու ռ հ ա յ ե Յ ի. 1991, 68–69, 156–157:

¹⁹ Ա դ ո ն ջ. 2012, 102:

²⁰ Ա դ ո ն ջ. 2012, 103:

«Թուրքիայի անդամահատումը» ուսումնասիրության մեջ վերստին անդրադառնալով Քրդստանի աշխարհագրական տեղադրման խնդրին, Ն. Ադոնցը գրում է. «Եթե արևելյան և արևմտյան Տիգրիսների բազուկների միախառնման վայրից, մոտավորապես Իբն-Ջեզայիից ուղիղ գիծ անցկացվի մինչև Դամասկոս, ապա այդ գծից արևմուտք կման սիրիական հողերը՝ գերազանցապես քրիստոնեական, իսկ արևելք՝ Միջագետքի հարթավայրերից և Զազրոսի լեռնային մասից կազմված ընդարձակ տարածքը, բնակեցված քրդական և արաբական ցեղերով, ընդ որում հարթավայրերը գերազանցապես զբաղեցնում են արաբները, իսկ լեռները՝ քրդերը»²¹: Ավելի մանրամասնելով նա հիշատակում է. «Տիգրիսից արևելք ընկած ամբողջ բարձրավանդակը, այսինքն Հաբյարի սանջաքը, Մոսուլի վիլայեթը (առանց Մոսուլի սանջաքի մի մասի) պարսկական հողերով հանդերձ, որոնք Ուրմիա լճից մինչև Լուրիսթան բնակեցված են քրդական ցեղերով, կկազմեն Քրդստանը: Սրա մեջ կմտնեն Սոուլ-բուլաղի մարզը, Արդեբանը և Դիզֆուլ գետի ավազանը մինչև Պարսկական Արաբստան»²²:

Քրդստանի համար նման սահմաններ գծելիս Ն. Ադոնցն առաջնորդվում է ոչ միայն տվյալ տարածքային միավորում տիրապետող էթնիկական խմբի բնույթով, այլև նրա պատմամշակութային էությունը և տնտեսական ամբողջականությամբ: Այսպիսով անվանի պատմաբանը քուրդ ժողովրդի բնօրրան է համարում Հյուսիսային Միջագետքը և Իրանի հյուսիսարևմտյան շրջանները, որոնք ընդունված է անվանել Իրանական Քրդստան: Այդ հանգամանքը հաստատվում է պատմական աղբյուրներով:

Աբբասյան խալիֆայության շրջանում քրդերի տարածման աշխարհագրական սահմաններն էլ ավելի էին ընդարձակվել²³:

Քրդերը եղել են միջնադարյան վայրիվերումների, արյունահեղ պատերազմների, ապստամբությունների, խռովահույզ շարժումների անմիջական մասնակիցներ: Քուրդ ավատատերերն իրենց ջոկատներով արաբների կողմից մասնակցել են Բյուզանդիայի և խաչակիրների դեմ պատերազմներին, հավասարապես նաև Հայաստանը նվաճելու գործին: X դարից սկսած քրդական իրականության մեջ ձևավորվում է ռազմաքաղաքական մի ինստիտուտ՝ ամիրաների և ամիրայության (հայկական աղբյուրներում հաճախ այն հիշատակվում է էմիրություն ձևով), որն իր գոյությունը պահպանեց ընդհուպ մինչև XIX դարի կեսերը: Ամիրը կամ ամիրան իրենից ներկայացնում էր առանձին տարածքում բնակվող ցեղերի ռազմաքաղաքական առաջնորդը:

Ապացուցված իրողությունն է, որ վաղ միջնադարում բուն հայկական լեռնաշխարհում քրդեր գոյություն չեն ունեցել: Նշված տարածքում քրդական էթնիկական տարրի առկայության մասին տեղեկություններ չկան ինչպես հայկական, այնպես էլ օտար աղբյուրներում: Հավանական է համարվում, որ արաբական արշավանքների շրջանում արաբների նոր կրոնը՝ իսլամը, ընդունած քրդական մի շարք ցեղեր և կամ արաբական բանակներին զինվորա-

²¹ Ադոնց. 1996, 101–102:

²² Ադոնց. 1996, 102:

²³ Ibn-Hawqal, Abi Al-Qasim al-Nusuibi, Kitab Surat al ard. 1966, 506–507.

գրված քուրդ հավաքականություններ արշավող խալիֆայական բանակների հետ մուտք գործած լինեն Հայաստան հաստատվելով նրա հարավային շրջաններում: Առկա է նաև քրդական ցեղերի Հայաստան ներթափանցման մեկ այլ եղանակ: Հայտնի է, որ ցեղերին բնորոշ էր մշտական հարաշարժվելությունը, իրենց անասունների համար՝ արոտավայրերի, ջրի աղբյուրների համար և այլն հավերժական որոնումները: Հենց դրանով, ինչպես նաև ժամանակի մի շարք ռազմաքաղաքական պայմանների պատճառով, մոտավորապես VIII դարից սկսած՝ ծայր է առել քրդական ցեղերի խոշոր մասշտաբների հասնող միգրացիոն շարժումներ ընդարձակ արաբական խալիֆայության տարբեր նահանգներ: X դարում, ի թիվս այլ ուղղությունների, նկատվում էր նաև քրդերի առանձին հավաքականությունների գաղթային շարժումներ դեպի հյուսիս՝ Հայաստանի կողմը: «Ժ դարի երկրորդ կեսին զուտ արաբ տարրը գրեթե բոլորովին չբացել էր Մեծ Հայքում, — գրում է արաբագետ Արամ Տեր-Ղևոնդյանը, — բայց նրա փոխարեն մի նոր տարր հաստատվեց Հայկական լեռնաշխարհում՝ քրդերը, որոնք բոլորովին այլ պայմաններում եկան, քան արաբները: Արաբները մտան Հայաստան որպես նվաճողներ... Քրդերի մուտքը Հայաստան շատ անաղմուկ էր, ուստի դժվար է գտնել դրա սկիզբը»²⁴:

Քրդական ցեղերը և ցեղային միությունները Հայաստան էին շարժվում գլխավորապես Հյուսիսային Միջագետքից՝ Մոսալի շրջանից և Տիգրիսի արևելյան ափերից ու հաստատվում Վասպուրականում, Աղձնիքում և այլ վայրերում: «Կորդուք և Տմորիք միաձուլվում էին հենց այն լեռնաշխարհի հետ, որը հետագայում Քուրդիսթան անունն ստացավ»²⁵: Կորճայքից քրդերը սկսեցին տարածվել դեպի Աղձնիք՝ Նիզանի և Սղերդի կողմերը, ապա անցան Արզն և Նփրկերտ, իսկ հետագայում՝ Բաղեշի վրայով մտան Վանա լճի ափազան²⁶: Մեծ Հայքի հարավարևմտյան շրջաններում հետզհետե վերաբնակվեցին քրդական ալ-համիդիյա (ալ-հումդիյա), ալ-բաշնավիյա և այլ ցեղեր, իսկ ալ-հաքքարիյա, ալ-բախթիյա ցեղերի մի մասը տարածվեց Անձևացյաձ գավառում²⁷: Ավելի ուշ քրդական ցեղերը թափանցեցին նաև Հյուսիսային Հայաստան և հաստատվեցին Դիլինի շրջակայքում, որտեղ Բագրատունիների օրոք ժամանակավոր իշխան դարձավ քուրդ ամիրա Մուհամմադ իբն-Շադդադը (951–954): Ի դեպ, նա առաջին քուրդ ամիրան էր Մեծ Հայքում²⁸:

Դիլինի շրջանում հաստատվել էր առ-Ռավադիյա ցեղը, որը, ըստ արաբալեզու հեղինակների, քրդական հայտնի Հադբանիյա ցեղային միության մի ճյուղն էր: Բացի այդ, արաբական ուժեղ ցեղերի հետ բախումներից պարտված կամ հակաարաբական ապստամբությունների ձախողման պատճառով քրդական ցեղերը հարկադրված էին որոնել բնակության նոր վայրեր:

Այսպիսով, ըստ էության, դեռևս մինչև Կենտրոնական Ասիայի թյուրքական ցեղերի զանգվածային տեղաշարժը դեպի Փոքր Ասիա, այդ թվում՝ նաև Արևմտյան Հայաստան, այդ գործը սկսել էին վաչկատուն քրդական ցեղերը: Արդեն X դարում Զաղիրայում, Ատրպատականում, Աղվանքում և Մեծ Հայ-

²⁴ Տեր-Ղևոնդյան. 1965, 191:

²⁵ Տեր-Ղևոնդյան. 1965, 191:

²⁶ Տեր-Ղևոնդյան. 1965, 193:

²⁷ Փոլադյան. 1999, 56:

²⁸ Տեր-Ղևոնդյան. 1965, 191:

քում ստեղծվել էին քրդական ամիրայական տներ: Այդ տներից առավել հայտնի էին Հասանվայհիների իշխանությունը (959–1095), որի հիմնադիրն էր քուրդ հզոր ավատատեր, Բարգիլքանի ցեղի առաջնորդ Հասանվայհ իբն ալ-Քուրդին²⁹: Առավել մեծ հզորության տեր էր Մարվանյանների Բանու Մարվան ամիրայությունը (984–1083), որի տիրույթները տարածվում էին Դիարբեքրի շրջանից մինչև Ջագիրա և Քերմանշահից մինչև Շահրեզուր³⁰: Այդ ամիրայության կենտրոնը Մայաֆարեքինն էր (պատմական Նփրկերտը): Մեծ Հայքի հարավարևմտյան մասում մարվանյանները հիմնեցին մի ամիրայություն, որի հիմնադիրն էր Բաթը (Բաթ Աբու Աբդուլլահ իբն Դուսթաք ալ-Խարբութի): Այդ ամիրայության տիրապետությունը տարածվեց Արճեշի, Խլաթի, Նփրկերտի, Մանազկերտի, Աղձնիքի և Վանա լճի հյուսիսային ու արևմտյան կողմի գավառների վրա: 983 թ. մարվանյանները նվաճեցին նաև Ամիրդը (Դիարբեքր), Մժբինը (Նիսիբիս) և Մոսուլը: Բաթը ասպատակեց նույնիսկ բյուզանդացիների ձեռքում գտնվող Տարոնը, կողոպտեց, կոտորեց ամբողջ գավառն ու ավարի մատնեց Մուշ քաղաքը³¹:

X դարի վերջերին ծնունդ է առնում Շադդադյանների ամիրայությունը (951–1088): Հիմնավորվելով Դվինում և Գանձակում՝ Շադդադյանները վերահսկում էին ողջ Հարավային Կովկասը, մասնավորապես՝ Արաքս և Քուր գետերի միջև ընկած տարածքը, ինչպես նաև Անատոլիայի, Իրանի և Հյուսիսային Իրաքի սահմանամերձ ողջ շրջանը: Այդ դինաստիայի մեկ այլ ճյուղը ընդհուպ մինչև XIII դարի վերջը վերահսկում էր Անի քաղաքի շրջակայքը և Հայաստանի սահմանամերձ գոտին³²:

Քրդերի ներթափանցումը Հայաստան

Քրդերի՝ դյուրին, անաղմուկ ու խաղաղ ներթափանցմանը Հայաստան, այսպիսով նպաստեց այն հանգամանքը, որ արաբական ամիրայական տները չկարողացան պահպանել իրենց գերիշխանությունը և նրանց տիրույթներն անցան ոչ թե երկրի բնիկ տերերին, այլ քրդական տարրերին: «Այն ճեղքվածքը, – գրում է Ա. Տեր-Ղևոնդյանը, – որ բաց էին արել արաբական ամիրայությունները Հայաստանում, նպաստեց քրդերի դյուրին ներթափանցմանը: Արաբ ամիրայական տները չկարողացան պահպանել իրենց գոյությունը, բայց նրանց տիրույթները ոչ թե վերանվաճվեցին երկրի բնիկ տերերի կողմից, այլ անցան քրդական տարրերի ձեռքը, որը իսլամացած և մասամբ արաբացած էր: Երկրի բնիկ իշխանները վերանվաճման որոշ փորձեր կատարեցին, բայց մեծ հաջողություն չունեցան, քանի որ Հայոց թագավորության մեջ չկար կենտրոնական ուժեղ իշխանություն»³³:

Հայաստանի քրդական ամիրայություններն ու կողմնապետություններն իրենց ներքին կյանքում անկախ էին: Ամիրներն օժտված էին ոչ միայն հարկային, այլև վարչական ու դատական ինքնավարության իրավունքներով:

²⁹ Minorsky. 1913, 512–513.

³⁰ Minorsky. 1913, 512–513.

³¹ Մարվանյան ամիրայության մասին տե՛ս Amedroz. 1903, 123–131.

³² Minorsky. 1953.

³³ Տեր-Ղևոնդյան. 1965, 191:

Նրանցից յուրաքանչյուրն ուներ իր արքունիքը, որը կենտրոնական արքունիքի մանրանկար պատճենն էր: Կենտրոնական կառավարության պաշտոնյաները մոտաք չունեին ինքնավար այս շրջաններում: Ամիրներն ինքնուրույն դատում էին հանցագործներին, նույնիսկ մահվան վճիռ արձակում և կամ դատը հանձնում շարժի դատաստանին, որին մասնակցում էին տվյալ վայրի մահմեդական բարձրաստիճան հոգևորականները՝ դադու գլխավորությամբ: Թուլմա Մեծուփեցին պատմում է, որ ամիրայությունների կյանքում մեծ դեր էին կատարում նրանց երկրամասերում տեղակայված քոչվորական ցեղապետերը և շրջանների կառավարիչները³⁴:

Ուշագրավ է, որ միջնադարյան աղբյուրներում վերոհիշյալ ամիրայությունները համարվում են ոչ թե քրդական, այլ արաբական³⁵: Անդրադառնալով այդ հարցին՝ Ա. Տեր-Ղևոնդյանը գրում է՝ քրդական ծագում ունեցող ամիրայական տները, որոնք գոյություն ունեին Հայաստանում վերջին Բագրատունիների օրոք, վերջին հաշվով արաբական ամիրայություններ էին: Նրանց օգտագործած գրական լեզուն արաբերենն էր: «Հայաստանի հողի վրա քուրդն ու արաբը, ինչպես նաև այլ մահմեդական տարրերը հանդես էին գալիս որպես միաձույլ ամբողջություն, ընդհանուր ճակատ կազմելով երկրի բնիկ հայ ազգաբնակչության դեմ: Եվ հայերենում «տաճիկ» արդեն նշանակում էր ոչ միայն «արաբ», այլև «մահմեդական» առհասարակ³⁶:

Այդ նույն հարցի վերաբերյալ Ա. Փոլադյանը հայտնում է հետևյալ տեսակետը. «Քրդական այդ իշխանությունները իրենց կառուցվածքով, ինստիտուտներով և նկարագրով, անկասկած, մահմեդական-ժառանգական իշխանություններ էին, որոնք սերտորեն կապված էին արաբամահմեդական աշխարհի հետ: Արաբները հանդիսանում էր այդ իշխանությունների պաշտոնական և հաղորդակցության հիմնական լեզուն»³⁷:

Ամիրայությունները, որոնք, ըստ էության, ավատատիրական ժամանակավոր միավորումներ էին, չլացուցիչ հաջողությունների հետ մեկտեղ ի վիճակի չէին երկար կյանք ունենալու: Ներքին հակասությունների, անվերջանալի և հյուժիժ երկպառակտությունների ու արտաքին հարձակումների հետևանքով աստիճանաբար թուլանում, անկում էին ապրում և, ի վերջո, մեկը մյուսի հետևից դադարում գոյություն ունենալուց:

Եզրակացություն

XI–XV դդ. շարունակվում էին քրդական ցեղերի գաղթային շարժումները, այդ թվում նաև դեպի հյուսիս՝ Հայաստանի կողմերը: Դրանք առավելապես պայմանավորված էին Մոսուլի, Դիարբեքիրի ու քրդաբնակ այլ շրջաններում տեղի ունեցող անընդհատ պատերազմներով, ավերածություններով և բնակչության սրածուլությամբ³⁸: Քրդական ցեղերը Տավրոսյան լեռնաշղթայի կողմերից հետզհետե տարածվում էին հայկական նահանգներում: Ի դեպ, XII դա-

³⁴ Մեծոփեցի. 1999, XXVI:

³⁵ James. 2006.

³⁶ Տեր-Ղևոնդյան. 1965, 192:

³⁷ Փոլադյան. 1999, 250:

³⁸ Bruinessen. 1992, 137.

րում առաջին անգամ «Քրդստան» անվանումը, որպես աշխարհագրական անուն և ազգագրական միավոր, չրջանառություն մեջ է մտել: Մատթեոս Ուն-հայեցու կողմից «Քրդստան» երկրանվանման հիշատակումը համարվում է ամենահինը ողջ միջնադարյան բազմալեզու մատենագրության մեջ³⁹: Հետագայում այդ տերմինը հիշատակվում է XIV դարի պարսիկ պատմիչ Համդուլլահ Մոսթոուֆիի կողմից նրա «Նուզհաթ ալ-Քուլուբ» աշխատության մեջ⁴⁰, ինչպես նաև նույն դարի պատմիչ Ռաշիդ ադ-դին Ֆազլուլլահ Համադանիի «Ջավան աթ-թամրիխ» աշխատությունում:

Այդ բոլորով հանդերձ, ընդհուպ մինչև XVI դարը Հայաստանի տարածքում զանգվածային քուրդ բնակչություն չի եղել. բացակայում են տեղեկություններ ինչպես հայկական, այնպես էլ օտար աղբյուրներում: Այդ հարցը հետաքրքրել է նաև Ն. Ադոնցին, որն իր մանրակրկիտ պրպտումներից հետո հանգել է հետևյալ եզրակացության. «Բացառությամբ Վանի և Բիթլիսի (քրդական – Վ. Բ.) իշխողների, որոնք գալիս են Թամուրի (Լենկ-Թամուրի – Վ. Բ.) ժամանակներից, մնացյալ քրդական տիրույթները Հայաստանի նշված շրջաններում՝ Եփրատի երկայնքով և Տիգրիսի ակունքներում առաջացել են ավելի ուշ՝ թուրք-պարսկական պատերազմների ժամանակ XV–XVI դարերի սահմանագծին»⁴¹:

Վահան Բայբուրդյան – պ. գ. դ., պրոֆ. ՀՀ ԳԱԱ արևելագիտության ինստիտուտի Իրանի բաժնի առաջատար գիտաշխատող: Գիտական հետաքրքրությունները՝ Իրանի և Թուրքիայի պատմություն, հայագիտության հարցեր, Մերձավոր և Միջին Արևելքի երկրների պատմություն, քրդագիտություն, հայ գաղթածականների պատմություն, միջազգային հարաբերություններ: Հեղինակ է 13 մենագրության և շուրջ 200 հոդվածի: vbayburdyan1933@gmail.com

ԳՐԱԿԱՆՈՒԹՅՈՒՆ

Ադոնց Ն. 2012, Երկեր, հ. 2 (լրացուցիչ հատոր): Հրապարակախոսություն, Երևան, ԵՊՀ հրատ., 540 էջ:

Դավրիժեցի Ա. 1990, Գիրք պատմութեանց, աշխատ.՝ Լ. Ա. Խանլարյանի, Երևան, ՀԳԱ հրատ., 592 էջ:

Ջաքարեայ Սարկալազի Պատմագրություն. 1870, հ. Ա, ի Վաղարշապատ, ի տպ. սրբոց կաթողիկէ էջմիածնի, 87 էջ:

Թովմա Մեծովեցի. 1999, Պատմագրություն (աշխատ.՝ Լևոն Խաչիկյանի), Երևան, «Մագաղաթ», 310 էջ:

Մատթեոս Ունհայեցի. 1991, Ժամանակագրություն, աշխարհաբար թարգմ. և ծանոթ. Հր. Բարթիկյանի, Երևան, 540 էջ:

Մարգարյան Հ. 1992, Ջաքարյանների ծագման ավանդությունը միջնադարյան հայ պատմագրության մեջ. – ՊԲՀ, № 2–3, էջ 146–149:

Մարգարյան Հ. 2019, Քրդերը XII–XIII դարերի հայ մատենագրության մեջ. – Քրդագիտական հետազոտություններ, հ. Լ, Երևան, ԵՊՀ հրատ., էջ 244–245:

³⁹ Ուն հ ա յ ե ջ ի. 1991, 68–69, 156–157:

⁴⁰ Н и к и т и н. 1964, 72.

⁴¹ Ա դ ո ն ջ. 2012, 193:

Փղաղյան Ա. 1999, Քրդերը Արբասյան խալիֆայության ժամանակաշրջանում (X–XI դդ.), Երևան, «Զանգակ-97», 302 էջ:

Տեր-Ղևոնդյան Ա. 1965, Արաբական ամիրայությունները Բագրատունյաց Հայաստանում, Երևան, ՀՍՍՀ ԳԱ հրատ., 311 էջ:

Лазарев М. С., Мгои Ш. Х., Васильева Е. И., Гасратян М. А., Жигалина О. И. 1999, История Курдистана. М., Ин-т востоковедения Рос. акад. наук, 261 с.

Поладян А. 1987, Курды в VII–X веках по арабским источникам. Ереван, Изд. АН АрмССР, 129 с.

Никитин В. 1964, Курды. М., «Прогресс», 226 с.

Amedroz H. F. 1903, The Marwanid Dynasty at Mayyafariqin in the Tenth and Eleventh Centuries A. D.- “Journal of the Royal Asiatic Society”, January. Royal Asiatic Society, pp. 123–131.

Anthony D. S. 1991, The Nation: Invented, imagined, Reconstructed?.- “Millenium Journal of international Studies”, vol. 20, no. 3, pp. 353–368.

Asatrian G. 2003, Prologomena to the Study of Kurds. – “Iran and Caucasus”, vol. 13, pp. 1–58.

Bruinessen M. Van. 1992, Agha, Shaikh and State: The Social and Political Structures of Kurdistan. London, Zed Books, 373 p.

Eppel M. 2016, A People without a State. The Kurds from the Rise of Islam to the dawn of Nationalism. Austin, University of Texas Press, 188 p.

James B. 2006, Uses and Values of the Term Kurd in the Arabic Medieval Literary Sources. Seminar of the American University of Beirut (AUB), Center for Arab and Middle Eastern Studies (CAMES), April. Beyrouth, Lebanon.- [http://halshs/archives-ouvertes.fr/halsis00350119](http://halshs.archives-ouvertes.fr/halsis00350119).

Limbert J. 1968, The Origins and Appearance of the Kurds in Pre-Islamic Iran.- “Iranian Studies”, vol. 1, no. 2, Cambridge University Press, pp. 41–51.

Minorsky V. 1913, Anazids. – “Encyclopaedia of Islam” (London), vol. I, pp. 512–513.

Minorsky V. 1940, Les origines des Kurdes.- “Actes du XX Congres International des Orientalistes” (ACIO). Bruxelles, S. 144–145.

Minorsky V. 1953, Studies in Caucasian History. London, Cambridge, 196 p.

Minorsky V. 1954, “Kurds”. – “Encyclopaedia of Islam”, 2 edition, vol. I. Leyden, pp. 1134–1135.

Ivanov V. 1940, The Gabri Dialect Spoken by the zoroastrians of Persia. Roma, Libreria di Scienze e Lettere, 164 p.

Ozoglu H. 2007, The Impact of Islam on Kurdish Identity Formation in the Middle East. – “The Evolution of Kurdish Nationalism”. Costa Mesa, Mazda Pub, 315 p.

Sharaf al-Din Bitlisi. 2005, The Sharafname, or the History of the Kurdish Nation, Book 1, Translation into English and commentaries by M. R. Irady. Costa Mesa.

Nöldeke Th. 1898, Kurdü und Kurden. In.: Beitrage zur alten Geschichte und Geographie für H. Kilepert. Berlin, S. 78–79.

Ibn-Hawqal, Abi Al-Qasim al-Nusuibi, Kitab Surat al ard. 1979, Beirut, pp. 239–241.

Ibn al-Athir, Al Kamil fi al-Ta’rikk, vol. 6, Beirut, 1966, pp. 506–507.

НЕКОТОРЫЕ ВОПРОСЫ ИСТОРИИ КУРДОВ И КУРДИСТАНА СРЕДНЕВЕКОВОЙ ЭПОХИ В КРИТИЧЕСКОМ СВЕТЕ

ВААН БАЙБУРТЯН

Резюме

Ключевые слова: курды, халифат, востоковед, Ураецы, Тигрис, Армения.

История курдов средневековой эпохи изучена сравнительно плохо. Основная причина этого – недостаточность или почти полное отсутствие источников. Средневековые арабские источники приводят данные об истории курдов только начиная с эпохи Омеядского халифата (661–750 гг.). По этому вопросу более ранние упоминания не дошли до нас, вероятно, по причине отсутствия. Из средневековых армянских авторов Маттеос Ураецы является первым автором, который в своем труде под названием «Хронология» упоминает этническое название «курд». В дальнейшем, начиная с XII века, этноним «курд» регулярно употребляется в армянских источниках.

В период раннего средневековья на территории Армении отсутствовали следы курдского населения. Только начиная с VIII века, когда начались миграционные движения курдских племен в разные части обширного арабского халифата, в числе разных направлений, начиная с X века, начались миграционные движения курдских племен также в северном направлении, то есть, в сторону Армении. Этот процесс продолжался и в дальнейшем, в течение последующих веков. Однако все же вплоть до XVI века на территории Армении отсутствовало массовое курдское население. Только в указанном столетии, благодаря прокурдской политике Османской империи, проникновение курдского населения в Западную Армению приняло массовый характер.

*Ваан Байбуртян – д. и. н., проф., ведущий научный сотрудник отдела Ирана Института востоковедения НАН РА. Научные интересы: история Ирана и Турции, вопросы арменоведения, история стран Ближнего и Среднего Востока, курдоведение, история армянских поселений, международные отношения. Автор 13 монографий и около 200 статей.
vbyburdyan1933@gmail.com*

SEVERAL ISSUES SHEDDING LIGHT ON THE HISTORY OF KURDS
AND KURDISTAN IN THE MEDIEVAL PERIOD

VAHAN BAIBOURTIAN

S u m m a r y

Keywords: Kurds, Caliphate, orientalist, Urhaetsi, Tigris, Armenia.

The medieval period of the Kurdish people is relatively less studied. The main reason for this is the scarcity or almost complete absence of sources. The Arabic medieval sources referred to the history of kurds since the period of Umayyad Caliphate (661–750 CE). Earlier references, on this issue, have not come down to us, probably, due to their lack.

Among the medieval Armenian authors, Matteos Urhaetsi was the first to mention ethnic name “kurd” in his “Chronicle”. In the future, beginning from the XII century, the ethnonym “kurd” was regularly used in the Armenian sources.

In the early Middle Ages, there were no traces of Kurdish population in the territory of Armenia. Only starting from the VIII century, when Kurdish tribes began to migrate to different parts of the vast Arab Caliphate, starting from the tenth century, Kurdish tribes, along with other directions, headed north, that is, towards Armenia.

This process continued in the consequent centuries. Nevertheless, the mass Kurdish population was nonexistent in the Armenian territory until the sixteenth century. Only due to pro-kurdish policy of the Ottoman Empire in the mentioned century, penetration of the Kurdish tribes into Western Armenia took on a mass character.

Vahan Baibourtian – Doctor of Historical Sciences, Professor, Leading Researcher at the Iran Department of the Institute of Oriental Studies of the National Academy of Sciences of the Republic of Armenia. Scientific interests: history of Iran and Turkey, issues of Armenian studies, history of Near and Middle Eastern countries, Kurdish studies, history of Armenian settlements, international relations. Author of 13 monographs and about 200 articles. vbayburdyan1933@gmail.com